

Jack Sargeant AS/MS

Y Gweinidog Diwylliant, Sgiliau a Phartneriaeth Gymdeithasol
Minister for Culture, Skills and Social Partnership



Llywodraeth Cymru
Welsh Government

Ein cyf/Our ref JS/00340/25

Y Cyngorydd Beca Roberts
Cadeirydd y Cyngor
Cyngor Gwynedd

23 Mai 2025

Annwyl Beca,

Ysgrifennaf mewn ymateb i'ch llythyr dyddiedig 24 Ebrill ynglŷn â'r cynnig a fabwysiadwyd mewn cyfarfod diweddar o Gyngor Gwynedd yn galw ar Lywodraeth San Steffan i ddatganoli pwerau darlledu a'r cyfryngau i'r Senedd, ac i Lywodraeth Cymru fwrw ymlaen â'r paratoi a'r drafodaeth gyda San Steffan ar y ffordd orau o gyflawni hyn.

Nodaf y pwyntiau a amlinellir yn eich gohebiaeth ynglŷn â'r diffyg rheolaeth dros y cyfryngau yng Nghymru, pwysigrwydd adrodd cywir a pherthnasol o ran y newyddion i ddinasyddion Cymru a phwysigrwydd y sector darlledu i gyflawni ein huchelgeisiau o ran y Gymraeg. Mae Llywodraeth Cymru o'r farn nad yw'r fframwaith darlledu a chyfathrebu presennol yn diwallu ein hanghenion.

Cyhoeddodd Llywodraeth Cymru [Ddatganiad Ysgrifenedig](#) ar 12 Mai yn nodi'r camau nesaf yn dilyn ein hymateb i adroddiad y Panel Arbenigol ar Ddarlledu y llynedd. Mae'r Datganiad yn adlewyrchu canfyddiad canolog y panel sef bod angen gweithredu i ddiogelu darlledu gwasanaeth cyhoeddus ac i wella sefyllfa gyffredinol y cyfryngau yng Nghymru. Mae'n tynnu sylw at ymrwymiad parhaus Llywodraeth Cymru i sicrhau bod gan Gymru lais cryfach ac nad yw'n cael ei gadael ar ôl wrth i'r sector barhau i esblygu. Mae'n cadarnhau fy mwriad i weithredu ar argymhelliad y Panel bod angen gwaith pellach ar y gwahanol lwybrau i ddatganoli pwerau darlledu. Bydd hyn yn cael ei wneud drwy gomisiynu gwaith i dynnu cyngor technegol at ei gilydd ar y pum llwybr datganoli a nodwyd yn adroddiad y panel arbenigol.

O ran eich pwynt ar drafodaethau rhwng Llywodraeth Cymru a Llywodraeth y DU, ein nod yw manteisio ar berthynas fwy cadarnhaol â Llywodraeth y DU i weithio'n fwy effeithiol mewn partneriaeth ar faterion darlledu. O ystyried y sefyllfa bresennol o ran pwerau, mae hyn yn hanfodol i sicrhau bod y fframwaith rheoleiddio darlledu yn gweithio i bawb. Cefais gyfarfod yn ddiweddar â Chris Bryant AS, y Gweinidog Gwladol a gwnaethom drafod pwysigrwydd fframwaith rheoleiddio effeithiol ac addas i'r diben ar gyfer darlledu er mwyn sicrhau llwyddiant yr economi greadigol. Rwy'n cyfarfod â Stephanie Peacock AS, y Gweinidog dros Chwaraeon, y Cyfryngau, Cymdeithas Sifil ac Ieuencid i barhau â'r trafodaethau hyn, ac i godi'r cwestiwn o ran sut y gallem archwilio opsiynau i gryfhau llais Cymru mewn penderfyniadau sy'n effeithio'n uniongyrchol arnom.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Jack.Sargeant@llyw.cymru
Correspondence.Jack.Sargeant@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Mae Llywodraeth Cymru yn parhau i fod yn ymrwymedig i sicrhau fframwaith darlledu a chyfathrebu cynaliadwy, llewyrchus ac addas i'w ddiben sy'n cyflawni mewn modd effeithiol y cyfryngau sydd eu hangen ar Gymru.

Yn gywir,

A handwritten signature in black ink that reads "JACK SARGEANT". The signature is written in a cursive style with a large, sweeping initial 'J'. A horizontal line is drawn underneath the name.

Jack Sargeant AS/MS

Minister for Culture, Skills and Social Partnership

Y Gweinidog Diwylliant, Sgiliau a Phartneriaeth Gymdeithasol